

東
華
續
錄

東華續錄

咸豐九十四

臣王先謙敬編

臣陶澐宣蒸校

六月癸亥朔諭內閣色克通額等奏參前任庫倫辦事大臣擅改祭山章程等語庫倫肯特依神山向係用湯退牛羊供獻前任庫倫辦事大臣貝子德勒克多爾濟到任後並不遵照定章沿照伊父倫布多爾濟在任時用活牛活羊供獻殊屬有違定制德勒克多爾濟著交理藩院議處嗣後恭祭神山仍著用湯退牛羊以符舊制○甲子諭軍機大臣等前因廣西軍餉支絀當諭湖南省接濟並疊經諭令四川山西陝西等省速撥協餉以濟軍餉本日據劉長佑奏艇匪聚眾江面不靖潯州未克則慶太思南等六府數十州縣與省城聲氣頓隔土匪竄起千百爲羣欲思勦賊必議增

兵而餉項日絀斷非本省力量所能按羅各軍積欠已多需款甚鉅卽鄰省稍爲籌措亦無濟要需等語廣西地瘠民貧兵艱餉竭自屬實在情形見擬進躡石逆並分勦賀縣等處股匪以保全局需用更繁駱秉章前奏先將劉長佑所部楚勇口糧發至九年十月底止欠解之七萬餘兩陸續找清以後每月勻撥二萬兩著駱秉章仍按月源源接濟以利軍行至山西陝西兩省前諭令於協解湖北月餉內劃解銀各十萬兩並諭曾望顏將四川省欠解銀十二萬五千兩迅籌陸續解往迄今未據報解著曾望顏英桂譚廷襄趕緊湊集撥解毋再推延將此由六百里各諭令知之○諭僧格林沁恆福奏北塘祁口續到夷船接收俄函並請派譚廷襄等來京籌辦各摺片僧格林沁等派員接收俄函業將米信令其撤回惟明常旣經出口因何又有米船駛至北塘復行進口情殊

叵測夷人在海口一帶廟內住宿和約內並未載有此條著僧格
林沁等派員曉諭令其迅速下船出口不可任其久踞致墮術中
祁口往來之船在高沙嶺驢駒河等處丈量水勢又有粵人登岸
詢問赴津路徑其爲英佛無疑該大臣等尤當督飭南岸馬隊官
兵輪流至祁口一路巡防如有紮營情事亦須派人向其開導斷
不可如烟臺金州等處任其登岸占踞總須以理相拒不可覺自
我開並曉諭居民不得與之接濟以杜窺伺至駐紮青縣官兵卽
照所請派副將牛浩然管帶俟此項官兵到防歸克興阿統帶此
時戰撫之機間不容髮防勦事宜僧格林沁業經辦理周妥惟撫
局屢降諭旨令恆福專辦實無旁貸豈可稍存成見有意推諉著
仍遵前旨相機妥辦所有請派譚廷襄等來津之處著毋庸議奏
片內已詳細批示諒該大臣等必能領會也俄信尙未據禮部送

到俟送到時再行相機辦理將此由五百里諭令知之○以四川天全州城被賊竄陷曾望顏下部議處○乙丑諭軍機大臣等瑞昌王有齡奏浙江軍餉罄盡一摺浙省見在防剿喫緊必須各省協濟軍餉自係實在情形本日已由六百里寄諭湖北湖南福建廣東四川江西各督撫按數撥解矣張玉良收集潰勇二萬四千餘人此輩多有眷屬無心戰鬪斷難得力若仍用之必致騷擾地方此時給與口糧不過暫時籠絡仍當設法徐爲遣散以節糜費見在賊勢蔓延兵力不敷堵剿全在激勵團練保衛身家不但可以協助官兵兼可節省軍餉據奏嘉興之賊時出擄掠多爲民團所敗可見百姓敵愾同仇深明大義著瑞昌王有齡飭屬認真團練如湖州紳士趙景賢等即可派辦毋得視為具文張玉良見紮石門灣步步進剿馬得昭爲後路策應趙景賢會同劉仁福由平

望兜勦著卽督飭各員分路攻擊克復嘉興進攻蘇郡毋稍延緩將此由六百里加緊諭令知之○諭據瑞昌王有齡奏浙江軍餉業已罄盡原有兵勇與招集江南潰軍共有五六萬之眾見在進攻嘉興援剿廣德均需大隊口糧不容稍缺請飭催各省協餉等語浙江甫遭蹂躪元氣未復而兵勇雲集士卒饑疲口糧無出自係實在情形著慶端瑞璜仍遵前旨籌撥銀數萬兩迅解浙江並著勞崇光耆齡飭粵海關監督毓清遵照部撥在於粵海關稅項下除應解內務府銀兩外下餘銀內先撥銀十萬兩解浙官文胡林翼駱秉章曾望顏毓科仍各按照前次部撥協款數目迅速籌撥解赴浙江俟曾國藩一軍到浙以資協濟毋稍延誤本日又據劉源灝奏粵匪竄擾黔境本地苗教各匪復事鴟張餉竭師疲力難兼顧請飭催撥餉等語四川省欠解黔餉甚多著曾望顏無論

何款迅卽籌撥銀二十萬兩就近解黔以濟急需將此由六百里
各諭令知之○諭劉源灝奏粵匪竄擾黔境內賊復肆鴟張憑陳
危急情形一摺粵匪擁眾萬餘由興義貞豐歸化竄陷廣順永甯
兩州城窺伺定番貴州省城附近苗教各匪乘間而起雖經趙德
昌等帶隊馳往擊退而清水江以內數百里賊蹤幾徧廣順甯經
收復其永甯竄踞粵匪勢正狍猖定番距省僅百餘里省城四面
受敵情形實爲危急著田興恕卽督大隊由石阡取道遵義徑抵
省門以顧根本並將粵黔等匪與劉源灝斟酌緩急力圖勦辦以
除醜類而靖地方毋稍延誤將此由六百里諭令知之○命沈兆
雲來京以莊受祺爲浙江布政使林福祥爲福建按察使由江西
吉南鎮
甯道
○調湯雲松爲江蘇按察使甯曾綸爲浙江按察使○命降
補總兵官鄭魁士往袁甲三軍營效力○丙寅諭軍機大臣等本

日據薛煥奏青浦松江相繼失守並嚴扼要隘迅圖克復一摺覽奏曷勝憤懣青浦松江於五月十二十三等日連行失陷該城文武竟不能爲一日之守且松江郡城設有提督五營額兵二三千名並有何桂清添派督標兵一百六十餘名儘足防剿乃賊匪竄至時僅有華亭婁縣募勇在西門接仗一次而五營員弁兵勇無一人出戰任令賊匪長驅入城實堪痛恨該處營務自張國樑在金陵督師後俱係參將游桂林主持是否聞警先逃著卽迅速查明嚴行參辦以伸軍律見在東西浹及得勝港等處水師雖經獲勝而逆匪仍踞城未退著薛煥卽督帶添募兵勇聯絡鄉團迅圖克復毋令再行蔓延至江蘇兵勇銳氣盡失潰逃相繼難期振作惟有鼓勵民團可輔兵力之不足見已降旨令前任內閣學士龐鍾璐爲督辦江南團練大臣晏端書爲督辦江北團練大臣著該

撫就近與龐鍾璐迅速籌商務令被賊郡縣一律舉行實力堵剿毋得有名無實至該撫召募呂宋夷兵助剿本有流弊既經英酋普魯斯喚回正可聽其撤歸不必再行強留張國樑所遺江南提督員缺未便久懸著該撫卽於江蘇帶兵各員中擇其得力堪以勝任者酌保一人候朕簡放並已諭知瑞昌王有齡恐蘇省無可保之員卽在浙省帶兵各鎮內酌量保奏矣至漕糧爲天庾正供關繫緊要蘇省未失地方產米之區尙多仍著該撫設法豫爲籌畫於明歲春間由海運津以備京倉支放是爲至要將此由六百里加緊諭令知之○諭前因嘉興廣德相繼失陷諭令瑞昌等飭令張玉良統帶水陸兵勇步步進紮以期迅復嘉興郡城本日復據薛煥奏青浦松江連日失守賊氛甚熾各等語江蘇松江地方與浙省嘉興壤地相接見在郡城雖被竄陷而嘉善各屬尙無賊

竄若賊由松江等處竄擾旁縣則蹂躪之區愈多攻剿更屬不易
浙省兵勇及各路援兵統計不下六萬名民間團勇又能奮勇殺
賊著瑞昌王有齡卽飭張玉良迅速由石門進剿以圖克復嘉興
保全浙境卽可進援蘇省並著激勵民團同心殺賊以助兵威見
在浙江帶兵各員除饒廷選已放浙江提督外有無得力太員堪
膺江南提督之任者著瑞昌王有齡一併察看保奏候朕簡放再
嘉興見雖失守而浙省產米之區尙屬不少明年漕糧正賦仍當
籌辦以實京倉著王有齡豫爲籌畫屆時由海運京毋誤天庾正
供將此由六百里加緊諭令知之○文煜奏烟臺海口續有洋船
駛到洋人廣東人約共一萬四五千馬一千一二百匹贏七八
十頭大車四十餘輛獨輪小車一百餘輛木桶木箱蔴袋等多件
委員問以見居煙臺何事答以避暑七月後卽赴天津該洋人復

探聽煙臺至利津及利津至天津水陸程途遠近並於山南平地試演礮車兼聞煙臺鋪戶傳說六月初旬起身並有大將軍卽日坐船西行已分咨僧格林沁等嚴防薛煥奏額爾金葛羅於五月十七十九日先後由滬啟碇並探得有會齊兵船於六月初旬偕抵大沽海口察看中國如何舉動始決戰和之說奏入諭僧格林沁恒福等妥酌辦理○以松江青浦府縣等城被賊竄陷薛煥下部議處○丁卯諭內閣前據浙江等省辦理團練並令在京大小官員各就地方情形直抒所見並各舉所知候旨派往茲據尙書許乃普等公保督辦幫辦各員請旨簡派以專責成自應一律辦理著派前任漕運總督邵燦作爲浙江督辦團練大臣並著浙江差委道員史致謬幫辦團練事宜卽按照河南等省所議章程體察情形妥爲辦理○諭軍機大臣等曾望顏奏石逆竄擾黔省偪

近川疆一摺粵逆石達開由紅水江竄入黔省分股攻陷永甯廣順等州勢甚猖獗川東一帶與黔省地方在在毗連若由黔入川更恐滋蔓難圖前調蕭啟江一軍赴川本爲防剿石逆而設嗣蕭啟江抵川病故楚軍統領乏人曾諭令官文等於湖南北兩省中揀派得力大員前往管帶此時如已揀派有人著卽飭令迅赴川省以資攻剿左宗棠見在襄辦曾國藩軍務前有旨令官文等妥速籌商該員是否能獨當一面令其赴川督辦軍務昨據曾國藩奏該員在楚南募勇隨同剿賊亦恐不能卽往蜀中此時川省軍務毫無起色滇匪旣未能除石逆又將竄擾該省據兩湖上游設或糜爛楚省亦有西顧之憂曾望顏本不得力曹澍鍾業已撤回此時並無熟悉軍務之員在彼督辦深爲可慮左宗棠前在湖南襄辦軍務尙爲石逆所畏若令督辦川省軍務能否勝任仍著官

文等迅速具奏再降諭旨將此由六百里各諭令知之○諭前因
粵匪竄陷廣順永甯窺伺定番貴州省城附近苗教各匪乘間蜂
起省垣危急當降旨諭令田興恕卽督大隊由石阡取道遵義徑
抵省城力圖勦辦茲據曾望顏奏粵匪石達開分陷永甯廣順等
處並有大股已破郎岱之說黔省畢節縣與川省敘永廳毗連如
該逆由遵義竄擾則必由南川縣入川儻由仁懷假道則綦江江
津合江等處皆屬可虞請飭田興恕帶兵由酉秀一路直入川境
再分兵一由綦江趨遵義一由敘永趨大定如兵力未敷卽於川
南川東招募團勇歸其統帶餉需亦由川省籌撥各等語石逆垂
涎川省已久黔省素稱瘠苦該逆未必意思久踞恐其聲東擊西
假道黔疆以遂入川之計四川滇匪尙未勦除所有該省兵勇均
赴天全井研兩處勦辦未暇分顧川南邊防若令石逆乘間闖入

必致滋蔓難圖著劉源灝田興恕酌量緩急通盤籌畫如黔省情形稍鬆探明果係石逆大股入川卽帶兵迅赴西秀由綦江敘永分投迎剿旣可以保川省藩籬亦可以樹黔省聲威毋致顧此失彼將此由六百里諭令知之○命江蘇按察使湯雲松幫同在籍內閣學士龐鍾璐辦理江南團練事宜○予四川陣亡布經歷汪應濤等祭葬世職○戊辰諭內閣本年朕三旬慶辰業經覃敷閭澤並將在京大員老親加恩優賚茲據吏兵等部查明外任大員老親有年逾八十者祿養承恩康彊逢吉洵爲盛世嘉祥允宜普加賞賚用示朕錫福推恩至意○諭軍機大臣等本日據王夢齡奏清淮餉源告竭釐捐幾無可抽勸捐亦無把握擬於江北各屬及兩湖江西東豫五省有漕各州縣按照缺分大小或四五百兩或二三百兩量力捐輸並措捐庫平銀一千兩以資倡率請飭湖

北等省各督撫一體飭屬照辦各等語清淮地方關係南北咽喉必得士飽馬騰方足以壯聲威近因賊氛逼近釐捐各項諸形短絀不得不廣爲勸捐以救目前之急湖北湖南江西山東河南各州縣或甫離賊氛或地方多事原不能責其一律捐輸惟軍興以來紳商富戶屢次輸將以佐軍儲況各州縣受國家豢養之恩目覩時艱急公好義之員諒不乏人著官文胡林翼駱秉章毓科文煜慶廉責令各該糧道實力勸諭飭令有漕各州縣按照缺分大小量力捐輸集有成數卽解交王夔齡糧臺以濟軍餉將此由五百里各諭令知之○諭前因何桂清奏派令查文經赴高寶等處辦防續據喬松年奏查文經業已渡江疊經諭知薛煥以查文經係專辦江南糧臺之員卽行迅速追回令其清理經手事務另揀委員於江甘一帶擇地安設江南糧臺餉項由上海源源接濟勿

令諸軍飢潰本日據查文經奏蘇松太道於應解餉需以本境設
防及供應英佛兩國防兵爲詞絲毫不解迭經催提仍屬罔應並
請將寄存浙江甯波銀十萬兩由海道解往應用等語江南糧臺
應放水師等餉薛煥於接奉前旨後諒已於江甘等屬另設糧臺
派委賢員辦理各軍需餉急迫卽著該撫於上海籌畫款項陸續
解往毋任匱乏致有貽誤查文經尙在高郵著薛煥遵照前旨卽
行追回令其將經手收支各款交代清楚如查有浮冒等弊卽著
從嚴參辦至夷人防兵自應由夷酋發給口糧斷無中國支應之
理何以該署道員吳煦於查文經催餉時輒以此言答覆是否實
有其事並著薛煥查明具奏毋稍回護其蘇省寄存甯波銀十萬
兩據王有齡奏此項與前存藩庫銀二十萬兩業已動用查文經
所請提解糧臺之處著毋庸議將此由六百里諭令知之○予貴

州陣亡知縣劉代英等祭葬世職○己巳 上以三旬萬壽節御
同樂園賜王大臣蒙古王貝勒貝子公等食○諭內閣劉長佑奏
官軍攻復慶遠府城一摺逆匪石達開竄踞廣西慶遠府城經劉
長佑督飭文武員弁先將分竄思恩河池等處股匪痛加剿洗剪
除淨盡該逆震恐自相殘殺知府榮林卽率勇練由西路前進署
宜山縣知縣況逢春等各帶團練由北路前進四月十八日榮林
勦賊獨山塘擊斃二千餘名況逢春等沿途轉戰亦斃賊千餘名
十九日會師臨城該逆開門由南路逃遁官軍追逐四十里殲擒
賊匪多名當將郡城克復著劉長佑乘此聲威飭令榮林等跟蹤
追勦迅掃賊氛毋畱餘孽所有在事出力文武員弁團練人等並
著查明保奏候朕施恩○庚午 上御同樂園賜王大臣蒙古王
貝勒貝子公及外藩使臣等食○諭軍機大臣等慶端奏浙省軍

情萬緊卽日統兵馳援並請飭催各路援師會剿一招逆匪竄陷
嘉興杭城危急瑞昌王有齡業經派張玉良督兵進剿並節次諭
令瑞昌總統江南諸軍由浙進攻蘇常兵力尙敷剿辦慶端請帶
兵前往會剿自係不分畛域但福建毗連浙省必須嚴防門戶以
免該逆乘虛竄越著慶端卽帶兵勇馳赴閩浙交界處所扼要駐
紮與浙省遙爲聲援毋庸赴浙轉致本省空虛見在曾國藩統兵
由祁門前進湖北派兵已多寶難再調官文等見已派員赴湖南
募勇江西亦經添派官兵援應均無須另行徵調所有福建派援
之金廈泉州兵勇著該督卽飛催前進毋稍延誤將此由六百里
諭令知之○命浙江在籍左副都御史王履謙幫辦本省團練並
督辦勸捐事宜○辛未 萬壽節 上御正大光明殿受賀 御
同樂園賜食次日如之○壬申諭軍機大臣等慶廉奏請暫畱勝

保在豫辦理招撫事宜一摺捻首孫葵心乞降疊據勝保翁同書先後奏聞當經諭知勝保該捻首如果真心來歸必須殺賊自贖再當酌辦不可輕率從事旋有旨命勝保來京已命翁同龢接辦招撫事宜惟此輩狼子野心難保不因人多乏食窮蹙來歸其應如何駕馭及部下人數如何分別遣散妥爲安插之處並諭翁同書通籌辦理矣著慶廉卽行知照翁同書仍遵前旨妥辦所請暫畱勝保辦理招撫之處著毋庸議慶廉見在出省駐紮歸德督辦防剿責無旁貸務當激勵諸軍與各國勇聯爲一氣認真堵剿不可因有議撫之舉稍涉大意所統兵勇當此新舊更替之際尤貴統馭得宜無使軍情渙散致有譁潰之虞將此由五百里諭令知之○命大學士彭蘊章毋庸在軍機大臣上行走○甲戌諭軍機大臣等瑞昌奏進攻嘉興待集援師並請催會國藩統兵迅速赴

浙會商一摺浙省各路援師並收集潰散兵勇爲數已屬不少正宜乘此兵力規復嘉興松江兩郡迅速進攻蘇州以期挽回大局若再遷延觀望俾賊匪得以從容布置勢將負隅久踞攻克又稽時日且恐四出蔓延防剿更形棘手曾國藩見由東流進駐徽郡擬俟增募湖南新勇到齊將皖南防剿事宜布置稍定再圖進取本日已諭令該署督卽行赴浙會商攻剿惟該署督兵尙未齊恐一時未能遽行到浙瑞昌惟當迅速啟程督同張玉良統率各軍攻克嘉興進剿蘇郡賊匪不得坐待曾國藩到杭亦不得以防守省垣爲詞株守杭城致誤事機另片奏請調河南山東各省馬隊二三千名赴浙助剿等語此時豫東兩省本處防剿正在喫緊之際本屬不敷分布勢難再撥他省將此由六百里加緊諭令知之○諭瑞昌奏請催曾國藩兼程赴浙一摺據稱浙省援師及收集

兵勇除由張玉良調攻嘉興外尙須分扼孝豐於潛嘉善等處見
在存兵無多急盼援師方能進規蘇州松江聞曾國藩已由東流
抵徽請飭兼程赴浙會商進剿等語已諭令該將軍卽將見有兵
勇統帶迅速啟程進取蘇松不得稍涉觀望惟該將軍兵力較單
亦屬實情曾國藩前奏於行抵徽州後尙須待新募勇到再行前
進自爲持重起見第蘇松常等府均屬財賦之區果能早爲規復
或可不致糜爛著曾國藩酌度情形如所帶官軍萬人合之瑞昌
兵勇足敷剿辦卽著星馳前進將蘇州等府縣城池速籌克復不
必再俟新勇其如何取道浙中以便與瑞昌面商各務並著斟酌
辦理至張芾督辦皖南軍務不能得力前諭曾國藩以徽甯本該
舊督兼轄地方如將該處軍務歸併辦理自覺事權歸一於到徽
後察度具奏曾國藩見已渡江著仍遵前旨卽將能否兼顧之處

據實奏聞將此由六百里加緊諭令知之○乙亥諭內閣前諭河南等省辦理團練並各派大員回籍督辦因念四川地屬巖疆毗連雲貴近因滇匪竄擾尙未肅清嘉慶年間該省舉行堅壁清野之法著有成效此次自應倣照辦理所有應辦事宜卽著籍隸四川在京官員就地方情形各抒所見該省官紳有名望素著練達時務者並著各舉所知候旨派往該官紳等必知共體時艱盡心籌辦用副朕綏靖邊疆之至意○諭軍機大臣等前因有人奏四川提督占泰臬司蔣徵蒲督辦軍務怯懦無能成綿龍茂道濮貽孫餽送曾望顏黃金遇事挾制等款當經諭令崇實等會同查參本日復有人奏川匪之起由筠連縣多徵洋藥稅銀並楊寡狗等無辜被誅以致激變事起之後署總督有鳳等茫無主意濮貽孫力主不發兵餉以致迭陷三城前此陳彥坤訐案因王慶雲與翁

祖烈同鄉戚誼代懇有鳳添派漢貽孫審辦陳彥坤得賄自認誤
控其銀則分派優缺州縣皆漢貽孫設法消弭寢馬營兵以數十
人斃賊二千餘人不爲保舉蔣徵蒲帶兵勦賊動卽避匿並未接
仗候補直隸州知州伍雲錦在紳士楊熙軍營辦理糧臺浮開兵
餉迭經控告三撤三委並漢貽孫趨附炎熱綽號撲燈蛾與蔣徵
蒲狼狽爲奸知府史致康爲之羽翼藩司祥奎於升調等事惟漢
貽孫是問致有濮作道四川開濮作臬四川滅之謠請飭查辦等
語吏治軍務相爲表裏果如所奏則四川吏治之壞已極若不亟
加整頓軍務安有起色著崇實東純按照所參各情並前諭查辦
各款一併嚴密訪查如有端倪卽將該員等奏請革職鞫嚴行
訊辦毋涉徇隱以肅法紀而儆官邪並著迅速具奏毋得遷延原
摺片二件均著鈔給閱看將此由五百里諭令知之○文彩以病

免調縣森爲工部尙書倭什琿布爲禮部尙書以伊勒東阿爲理

藩院尙書

由工部左侍郎遷

○丙子諭內閣前諭河南等省辦理團練令

在京大小官員各就地方情形直抒所見並各舉所知候旨派往
茲據尙書陳孚恩等以江西毗連安徽浙江廣東等省擬辦團練
酌保辦理人員並擬團練事宜八條呈覽自應一律舉行在籍四
品銜前任翰林院修撰劉繹舊賞加三品京堂銜作爲江西督辦
團練大臣並著吉南賴甯道沈葆楨布政使銜甘肅安肅道劉于
濤幫辦團練事宜卽著按照該尙書等所擬章程體察情形妥爲
辦理務須抽選壯丁按期操演毋得團而不練以致有名無實所
需器械卽由團練處編號散給俟軍務告竣時卽令繳還所有河
南等省議定章程並著鈔給閱看酌量遵行○僧格林沁等奏洋
船先後駛至海口十餘隻並接收米國照會鈔錄呈覽得旨此次

米夷既有照會，明露欲爲英佛調處之意，是已有議撫端倪，即可迎機善導。該大臣擬俟英佛照會到時，由恒福照覆，令其照例進京換約，並約其卽赴北塘會商，爲先占以禮相待地步。所論甚合機宜。著恒福乘此機會相機辦理。○以福濟爲工部左侍郎，文俊爲西甯辦事大臣，麟魁爲刑部右侍郎。降調禮部尚書○丁丑諭軍機大臣等：薛燦奏克復松江府城，見乘勝進剿一摺。江蘇松江府城被賊匪竄踞，經薛燦飭令候補道張景渠等會同直隸州知州應寶時等約會民團分投進剿。五月二十七日，賊匪分路出巢圖竄上海。官軍乘其不備，卽刻進攻，直抵南門城下，施放槍礮轟斃逆匪多名。城內各匪慌亂，我軍攻破城門，應寶時督令兵勇首先由南門殺入，兵勇民團一齊擁進，斃賊一千餘名。當將松江府城克復。城內餘匪經兵勇乘夜接捕淨盡，其圖竄上海之賊經各路兵勇

民團沿途截殺斃賊無算該匪星奔四散悉爲民團擊殺剿辦甚爲得手著薛煥督飭水陸兵勇激勵民團乘此聲威迅復青浦進攻蘇州省城以慰朕懷所有此次出力之文武員弁兵勇並團練紳董勇丁著薛煥查明保奏候朕施恩其前經降旨令查之失事文武員弁是否聞警先逃仍著查明從嚴參辦毋稍寬縱○諭前諭順天直隸辦理團練並令在京大小官員就地方情形各抒所見並各舉所知候旨派往茲據侍郎齊承彥等公同酌保督辦幫辦各員開單呈覽自應一律辦理著派候補內閣學士桑春榮作爲順天直隸督辦團練大臣並著大順廣道聯捷幫辦團練事宜卽按照河南等省議定章程體察情形妥爲辦理○曾國藩奏連日淮浙江撫臣王有齡函稱蘇屬多爲賊陷又陷松江郡縣太倉嘉定失而旋復張玉良進攻嘉興兩次獲勝廣德州業經收復統

計浙省兵勇六萬餘人是兵力已厚不獨杭城可保且能由嘉興以漸圖蘇松賊勢趨杭一節當不至上勞宸廑至安慶一城有楊載福彭玉麟曾國荃等水陸扼紮斷賊接濟惟逆匪四眼狗母妻宗族皆在城中秋間援賊必至如能與多隆阿李續宜各軍合力擊退則城賊勢窮可期得手但使陳逆全股與安慶桐城官軍相持亦足分下游之賊勢紓蘇浙之兵力至南岸三路進兵之說目今賊燄彌盛占地愈廣我軍合力進攻深恐賊鈔我後適接王有齡函開中路不宜遽進深陽恐其驅賊南犯臣擬俟左宗棠李元度鮑超張運蘭等先後到齊北路則直趨池州南路則直趨廣德中路則暫不深入先守徽甯要隘庶免鈔我後路亦無偏賊南竄之虞此臣注重安慶皖南不敢先圖蘇常一隅之微意上諭

軍機大臣等前因江蘇軍情緊急諭令曾國藩星馳前進迅復各

城茲據奏稱不宜遽進溧陽恐其驅賊南犯擬俟左宗棠等到齊
分路進攻先守徽甯要隘以免賊匪鈔後自係持重老成之見著
照所擬辦理至浙江軍務張玉良進攻嘉興雖獲小勝尙未克復
郡城見在松江府城克復薛煥會督兵團進攻青浦若同該署督
所派援軍分道並進與瑞昌等軍會合進剿更可大振軍威該署
督務當兼權緩急毋得坐失機宜將此由六百里諭令知之○署
陝西巡撫譚廷襄奏請陝省兵馬兼歸巡撫節制得旨著侯樂斌
抵陝與譚廷襄妥爲商酌若各鎮協以下均由巡撫節制其升調
缺分兵馬錢糧有無違礙之處一併熟商不可各存意見務期有
益於地方籌畫妥當會銜具奏○戊寅諭軍機大臣等僧格林沁
恆福奏夷船連檣而至津沽防守喫重一摺夷船一百數十隻均
在攔江沙外停泊距海口不過三四十里僧格林沁調派馬步官

兵分紮各路並於埕子莊地方豫籌馬隊以備臨時截擊布置諒已周密該夷此次調集兵船聲言水陸並進意圖報復實則以兵脅和勞崇光辭煥均探該夷有議和之意米夷又欲從中調處是英佛不專主戰已可概見今旣在攔江沙外停泊卽著恆福派委委員詢其來意並先行照會該酋令其照米國之例少帶從人由北塘進京換約朕思僧格林沁海口布置雖已周妥惟念決裂之後從此兵連禍結迄無了期朕又何忍沿海居民遭其荼毒恆福身任地方當仰體朕心不可因海口設防嚴密仍存先戰後和之意所有如何照會之處卽著妥籌速行辦理○諭據王有齡奏通飭各屬舉行團練等語本年三四月間賊踞分水瀉安等縣附近民團隨同殺賊長興西南兩鄉二萬餘人殺賊數千縣境肅清嘉興之王店鎮等處團勇沈毀賊船拏獲奸細殲斃賊匪無數蘇省

所屬吳江縣之同里等鎮亦經該撫委員諭令聯絡完善各鄉集團自禦俟有官兵前進助剿各該處舉辦民團踊躍奉行無不同仇敵愾願隨官軍攻剿共圖恢復實屬義勇可嘉該撫通行勸諭並先給功牌獎勵辦理亦甚得宜見在諭令各省辦理團練已有旨派前任漕運總督邵燦作爲浙江督辦團練大臣並著浙江差委道員史致諤等幫辦團練事宜矣惟團練原爲紳民義舉以衛桑梓而固疆圉各省係民捐民辦地漕爲天庾正供豈容絲毫短少若各直省紛紛請免國家經費有常庫款將從何出王有齡所稱請免地漕之處萬不可行著毋庸議仍令各該紳民出貲自行捐辦俟捐貲積有成數或將來援照成案請加通省中額廣各州縣學額或照推廣捐輸例從優給獎擢予官階或照軍功優敘與在事出力打仗人員一體保奏優加甄敘但能辦有成效殺賊立

功朕必破格施恩以昭懋賞該撫卽當出示曉諭妥爲辦理總期兵民聯爲一氣以資攻剿見在平望旣經克復卽著瑞昌督飭各軍會合民團迅復嘉興次第攻克蘇常是爲至要將此由六百里諭令知之○浙江巡撫王有齡奏在籍道員趙景賢督帶練勇收復湖州平望地方得旨嘉獎○追予福建陣亡道員趙印川建祠並入祀本籍昭忠祠○予江南陣亡副都統多隆武等祭葬世職○己卯諭軍機大臣等據德楞額等奏蘭郊等界剿辦情形見仍督飭兵勇躡蹤剿捕並挑備馬隊聽候海防調撥一摺據稱匪首翟三禿子被擊帶傷竄至沙墩經營總依查布等跟蹤追襲竄入瀘塘哈勒洪阿自長城搜捕到磨山莊塢地方生擒張士蘭等二十餘名正法翟三禿子身受重傷竄入江南蘭郊邳沭等界漸就肅清匪首洪佃一仍踞項城尙覬覦我軍等語該匪疊經官軍痛

加剿洗餘黨無多惟匪首翟三禿子洪佃一尙未就擒見在江北軍務正當喫緊之際難保不勾結爲患亟應乘勝殲除淨盡以絕根株著德楞額等不分畛域分路兜剿務將翟三禿子洪佃一二犯捕獲勿使一名漏網以清餘孽文煜所調馬隊該副都統業經挑撥吉林等馬隊共二百五十名令營總穆隆阿等管帶聽候調遣著俟文煜調撥卽令啟程德楞額見在追捕餘匪俟蘭郊費嶧一律肅清仍回韓莊駐紮勿庸前赴登萊一帶以專責成將此由五百里諭令知之○諭昨因夷船在攔江沙外諭令恆福先行照會該酋令其少帶從人來京換約本日據僧格林沁等奏夷船三十餘隻駛至北塘海口夷人登岸占踞村莊恆福見照會米酋轉約英佛二夷進京換約所辦尙爲妥善著恆福卽分擬照會徑行給與英佛告以汝等此次既到北塘足見真心和好有意換約而

來如願照米國之例進京換約必代爲轉奏俟奉旨允准卽可由
此北上佛國照會內告以上年爾國並未助英國打仗大皇帝深
爲嘉獎此次來至北塘換約從此更敦和好如此分別照會看其
如何答覆迅卽馳奏至大沽後路及天津郡城著僧格林沁仍嚴
密防範毋稍大意○庚辰諭內閣前據御史薛書堂侍郎宋晉御
史福寬等奏請裁汰河員並改設漕運總督簡員駐守各摺片當
交御前大臣軍機大臣會同該部議奏茲據載垣等奏遵議裁汰
河工文武官員酌改操防營伍各事宜開單呈覽江南河道總督
統轄三道二十廳文武員弁數百員操防修防各兵數千名原以
防河險而利漕行自河流改道舊黃河一帶本無應辦之工官多
閑冗兵皆疲惰虛費餉需莫此爲甚所有江南河道總督一缺著
卽裁汰其淮揚淮海道兩缺亦卽裁撤淮徐道著改爲淮徐揚海

兵備道仍駐徐州所有淮揚淮海兩道應管地方河工各事宜統歸該道管轄廳官二十員內豐北蕭南銅沛宿南宿北桃南桃北外南外北海防海阜海安山安十三廳均係管理黃河見在無工又管理洪湖之中河裏河運河高堰山盱揚河江運七廳見在工程較少均著一併裁撤惟中河等七廳有分司儲蓄宣洩事宜所有裁撤之運河中河二廳事務著改設徐州府同知一員兼管裁撤之高堰山盱二廳著改設淮安府同知一員兼管裁撤之裏河廳著改爲淮安府督捕通判兼管裁撤之揚河江運二廳著改歸揚州府清軍總捕同知兼管至裁撤黃河無工十三廳原轄各工段汛地卽著落各該管州縣官管轄不得互相推諉各廳所屬之管河佐雜人員除揚莊等廂官十員專司啟閉毋庸裁撤外其宿州等管河州同五缺高郵州等管河州判三缺東臺等管河縣丞

十九缺高良澗等管河主簿二十一缺阜甯等管河巡檢十六缺均著一併裁撤清江地方緊要著添設總兵一員作爲淮揚鎮總兵駐紮該處俟軍務平靜再行改駐揚州原設河標中營副將一員著卽裁撤改爲鎮標中軍遊擊駐紮蔣壩其淮徐遊擊一員駐紮宿遷所有鎮標中營員弁並右營廟灣洪湖佃湖等五營遊擊以下官五十四員馬步守兵共二千五百餘名原屬操防悉仍其舊至蕭陽等營所屬修防兵六千九百餘名著一律改爲操防將二十四營改設蔣壩宿遷蕭離豐沛桃源安東山阜高郵葦蕩左右等十營除酌畱遊擊以下八十一員外其餘六十一員悉行裁撤以上各營官兵均歸新設淮揚鎮總兵統轄著卽裁汰老弱簡選精壯認真操練以資戰守見在江南軍務未竣該省督撫勢難兼顧所有江北鎮道以下各員均著歸漕運總督暫行節制○諭

軍機大臣等僧格林沁等奏米夷照會內稱英佛兩國卽欲交兵
見有夷船結隊出村意圖撲犯一摺米夷照會恆福有業已無法
之語是該國不能從中調處該督仍給與照會令其轉致英佛弭
兵和好措詞頗爲得體惟米夷既有推諉之意自應徑行照會英
佛示以中國寬大或可稍知悔悟此次該夷出村撲犯業經擊退
在我給與照會並非示之以弱前降諭旨已極詳備該大臣等必
能仰體朕心也將此由五百里諭令知之○袁甲三奏定城踞賊
經官軍疊次痛剿援絕勢窮詎自五月二十六七日後大雨時行
淮河水勢大發各湖同時異漲營盤多被衝塌臣料該逆必將乘
雨繞竄因派撥各隊分別布置六月初四日該逆五六千人由山
僻小路繞撲于昌麟營盤各營趕到前後奮擊該逆退竄鮑家圩
初八日副都統善慶等帶隊往剿立將該圩攻毀殺賊二三百名

初九日該逆仍由橫山口僻路回竄善慶等登高瞭望馳驟下山截擊槍箭齊施該逆首尾不能相顧副都統烏勒興阿亦帶隊馳到會合夾擊追至楊家圩于昌麟等伏兵齊起殺賊六七百名生擒一百七十餘名餘賊遁回城中其由北門出竄之賊經薩薩布等四面衝擊斃賊五百餘名生擒三十餘名見在淮水斗長三丈有餘不惟各路營盤被淹且糧價頓昂柴草俱缺兵勇暫擇高阜駐紮臣亦暫於舟中辦事一俟天氣晴霽卽激勵諸軍迅拔堅城其駐紮盱眙之向得聰一軍先已調赴前敵助剿見飭徐立壯酌留兵勇牽制南路賊勢並調薩薩布得春帶隊馳回併力圍攻又奏自滁州解圍後總兵李世忠約會全椒守將遊擊李顯發等內外夾攻五月十二日該鎮督帶參將朱元興等直攻河北賊營李顯發等整隊出城兩面環攻賊匪登時紛亂立將賊營踏平十三

日李顯發等搶過浮橋扼紮南岸直衝賊營該逆驚亂奔逃河南賊壘亦卽乘勢平毀先後斃賊一千餘名生擒二百餘名該逆向西敗竄我軍追殺四十餘里全椒城圍立解二十一日潛師出滁城徑襲來安李世忠與朱元興等分三路進攻擒斬甚多該逆閉門死守我軍晝夜環攻城高濠深急切難下李世忠恐定來逆賊彼此援應隨分隊於三界石壩張八嶺一帶紮營疏通糧道並斷賊援臣查來安係滁全後路且與天六毗連斷難任賊久踞今滁全均已解圍亟宜乘勝趕復來安見將盱眙存糧設法轉運以濟軍食一面由臨淮籌撥軍火俾各軍併力環攻迅圖克復均報聞

○壬午諭軍機大臣等僧格林沁等奏夷人勢大志驕暫難議和憑情直陳一摺所奏情形尙爲透徹此次夷人連檣而至原屬意存叵測不可不嚴爲之防僧格林沁恐一意三撫以致懈我軍心

所慮尙是惟恆福身任地方撫事責無旁貸且十七日之戰旣已擊斃五十餘名以後並無動靜未必非候我給與照會藉此轉圜該督務當平心和氣妥速辦理若坐失機宜該督不能當此重咎也○癸未諭軍機大臣等本日據劉源灝奏各匪竄陷歸化修文等城逼近省垣請飭田興恕迅速援省並據田興恕奏見在籌辦防剿情形及部署下游各軍卽行督軍赴省各摺片粵匪自攻陷歸化廳城後已至羊昌河一帶距省不及百里苗教各匪攻陷修文縣城屯聚省城數十里外省中存兵無多三面受敵異常喫緊田興恕雖飭副將沈宏富劉吉三兩軍由湄潭資安赴援尙恐緩不濟急著田興恕迅將剿辦下游各軍部署完竣卽督所部由夔川取道遵義馳赴省城會同巴揚阿等兵練分投堵蕩勿畱餘孽一俟省垣情形稍鬆仍卽馳回石阡相機堵剿以固川省門戶

興恕所奏勸捐抽釐事權未能歸一等語幫辦軍務貴東道何冠英著卽專辦該省勸捐抽釐諸事以濟餉需其糧臺事務著劉源灝另行揀員襄理毋庸令該道會辦以專責成至黔中州縣疲玩成風屢經田興恕札飭辦理捐釐各州縣動以養練爲詞任意開銷全無實際該撫甫經到任無所用其回護著卽認真查明嚴參懲辦以除積弊將此由六百里諭令知之○以貴州歸化修文廳縣城被賊竄陷劉源灝下部議處予陣亡道員周夔等祭葬世職副將田興奇祭葬世職建祠○甲申諭軍機大臣等本日據僧格林沁等奏英夷送來免戰白旗擬卽照會令其定期會晤一摺並將照會及旗事各件鈔錄進呈夷船於駛近北塘河口後瞥見火攻木筏備齊卽恩迫回駛以致輪船閤淺其船上夷人二名上岸各執白旗一面上書免戰二字另有摺疊白布一塊據稱須臾作

往來之用各等語顯有就我範圍之意恒福所給照會深得大體
惟佛國亦有兵船在津亦須一律給與照會如願來京換約卽與
約定日期迅速具奏諒恒福必能仰體朕心不避艱難妥速辦理
也僧格林沁仍當督飭馬步各營加意嚴防不可稍涉大意○己
酉諭軍機大臣等本日據薛煥奏松江克復後查獲賊匪偽諭一
紙內有兩粵兵勇三千餘人欲由上海投誠字樣廣勇通賊爲害
非鮮請通飭各省軍營裁汰驅逐毋令入伍等語各省軍營招募
廣勇歷有年所若如該署督所奏該勇與逆匪勾結蓄意不良本
年江南大營潰敗實由於此不可不嚴爲之防著袁甲三翁同龢
瑞昌王有齡慶廉李若珠於各該營內嚴密詳查此項勇丁如有
逆迹顯露已得其通賊實據者除將該犯立即正法外並行文該
逆本籍夷其族屬以儆兇頑而消反側其尙無通賊實據而平日

素不安分者亦須分別裁汰嚴行驅逐或資遣回籍毋許再招入伍以期盡絕根株袁甲三等當慎之又慎不可因循姑息致蹈覆轍再本日據薛煥奏江震所屬之平望前經湖州紳士趙景賢於五月二十六日帶勇克復後因賊眾蜂聚聞又失陷等語平望克復瑞昌等業經奏聞此次因何失陷並進攻嘉興是否得手著瑞昌王有齡迅速具奏將此由五百里各諭令知之○薛煥奏江陰縣城於五月十六日被賊復陷嘉定縣城克復後又因松郡餘匪回竄崑山蘇州援松之賊到處焚掠北簪山紀廟野雞墩黃渡等處徧地賊蹤均經臣分派兵勇民團擊退而黃渡一股忽於六月初五日回竄嘉定城復失陷臣見派兵進攻而太倉寶山上海亦均派撥兵圍堵截報聞○丙戌諭內閣前因御史許其光朱潮奏請清理刑獄各一摺當派肅順文祥會同刑部覈實查辦茲據奏

稱查明監禁各案犯將情節較輕及無難速結之段大等四十二名已分別發放取保省釋矣刑部見審事件與彙題會審各案均有定限例義本極嚴明承審司員如果照限完結何至案有留牘獄多繫因此後著該部堂官飭令承審司員務須遵例迅速審結不得怠玩遷延致有積壓如有任意因循逾限不完者卽著咨部照例議處其新分到部之員律例未諳該堂官等亦應令其潛心講求日久再行試令聽斷庶於見審各案方無枉縱如有不堪造就者尤當隨時甄別以昭慎重至當月司員向有分別收禁人犯之責嗣後新進之員著隨同學習當差俟二年後再行輪值當月以免濫行收禁之弊○諭軍機大臣等據瑞昌王有齡奏攻克平望及嘉興疊獲勝仗長興廣德防堵戒嚴一摺五月十七等日張玉良親督官弁並派令馬德昭等分路進攻將嘉興城外逆匪疊

卡一律攻毀埽除淨盡見在偏近西城紮營勦辦尙爲得手著瑞昌王有齡督飭張玉良等乘此聲威迅速進攻卽將嘉興府城克復毋令賊匪久踞致滋蔓延至平望踞賊經瑞昌等奏經湖郡紳士趙景賢於五月二十六日擊退將平望鎮克復昨據薛煥片奏亦稱趙景賢於二十六日克復平望後因賊眾蜂聚聞又失陷平望鎮究竟是否得而復失著瑞昌王有齡確切查明迅速具奏其竄入長興之賊並著迎頭截擊痛加勦洗勿令賊眾闖入境內以致牽掣我軍該將軍等惟當力保湖郡進攻嘉興以期迅拔堅城肅清浙境將此由六百里諭令知之○諭前據曾國藩奏酌擬變通進兵章程北路趨池州南路趨廣德中路先守徽甯俟布置稍定後卽親赴淮揚籌辦鹽漕大江南北兼顧統籌尙屬周妥惟薛煥僻處海隅兵力單弱勦辦恐難得手瑞昌尙在浙省張玉良收

集潰軍進攻嘉興雖獲勝仗亦未收復郡城此時蘇常一帶並無重兵攻剿前因李若珠已患痺疾在江北帶兵未能得力是以命都興阿馳往督辦本日據該將軍奏稱湖北無兵可撥尙在英山駐紮似此節節耽延將來賊勢北趨剿辦愈難措手卽完善之區鹽漕亦不易辦曾國藩見授爲欽差大臣大江南北水陸各軍均歸節制事權歸一責無旁貸著飭催左宗棠李元度鮑超張運蘭等到齊由池州廣德分路進兵規復蘇常其江北一帶尤爲緊要應如何布置之處亦應悉心籌畫免致臨事周張該大臣膺茲重任務當統籌全局迅掃逆氛以副委任將此由六百里諭令知之○諭前命都興阿馳赴江北因馬隊兵單恐其遷延日久有誤事機疊經諭令官文胡林翼迅飭多隆阿舒保將所部馬隊酌量撥赴都興阿軍營與該將軍見有馬隊合計湊足四五百名並調得

力兵勇三四千名派鎮將大員一二人管帶聽該將軍調遣茲據都興阿奏屢次催調馬步各隊未經籌撥進止兩難請旨遵行等語江北久無統帥防剿喫緊李若珠見患痺疾力不能支將來蘇常克復後賊勢必致北趨亟宜嚴密布置以固江北藩籬朕以都興阿聲威素著特命剋期前往督辦堵剿事宜該將軍受恩深重宜如何奮勉圖功迅速啟程乃至今遲延不進殊非朕意據該將軍奏稱兵勇不敷鄂省官軍雖已調出多名而湖南添募勇丁不日可到著官文胡林翼仍遵前旨迅卽添調馬隊並得力兵勇三四千名速赴都興阿軍營以便該將軍統帶前進馳赴江北督辦防剿勿得再行遲延致誤事機所需餉項仍著官文等寬爲籌備毋令缺乏本日已降旨將曾國藩補授兩江總督並授爲欽差大臣督辦江南軍務大江南北諸軍均歸節制都興阿與該大臣曾

經共事自可協同商辦總之江北地方軍務緊要該將軍不得有畏難之心官文胡林翼不得存畛域之見惟期同心共濟迅掃賊氛朕實有厚望焉將此由六百里各諭令知之○實授曾國藩兩江總督並命爲欽差大臣督辦江南軍務○丁亥諭軍機大臣等巴棟阿奏籌辦鎮防兵勇情形請添調營兵一摺另片奏水師分泊不均請簡員督帶師船等語鎮江見在實存兵二千八百餘名所出各缺原應由各省挑補惟湖南等省或見辦防剿或徵調已多勢難再撥該署將軍所請各省共撥兵四千赴鎮江之處應毋庸議賊踞蘇常有窺伺鎮江之意巴棟阿卽就見有之兵力認真堵剿該處各勇旣有一萬四千餘名之多若能認真訓練亦可隨同官兵助剿不得因係久募之勇任其坐糜糧餉至江面水師本歸李若珠調遣據巴棟阿奏稱除泊儀徵英洲頭一軍以防浦六

竄匪外其餘北岸停泊之船皆宜歸併南岸等語江面水師全在分布得宜方能有益若偏重一處必致顧此失彼著李若珠卽責令擇要分泊上下梭巡嚴扼江面見在楊載福已令李德麟吳全美等駛赴下游可與陳國泰等師船互相聯絡以重江防總宜視各口之險夷以定師船之多寡方爲妥善並著李若珠於水營鎮將中擇其堪以統帶師船者酌保一員聽候簡派以專責成而杜觀望將此由六百里各諭令知之○諭據巴棟阿奏江防喫緊亟應先靖江面南北兩岸上下袤延數百里之遙艇師二百餘隻見擬擇要分泊等語江面分布艇師兵力尙形單薄前有旨令吳全美艇船駛赴下游李德麟在魯港仍飭令疏通江路與吳全美聯絡聲勢昨據楊載福奏已飭李德麟師艇與吳全美併赴下游以資分布見在江防喫緊著楊載福嚴催吳全美李德麟剋期帶領

所部師船迅速前赴下游聽候李若珠調遣毋得稍有遷延致誤
事機將此由六百里諭令知之○前署四川總督曾望顏奏克復
天全州城報聞○以東純兼署四川總督由成都將軍署○戊子諭軍機
大臣等本日僧格林沁等奏接得英夷照會鈔錄呈覽並俄夷同
來應否准其會面各摺片額爾金投遞照會雖語多要挾然並非
專意主戰亦可概見此次但告以中國與兩國並無必戰之心額
爾金係八年原議和約之人此時前來換約與八年原約並無不
合如有應行面議之事大皇帝見派有欽差在京面議汝等即可
定期由北塘進京議定爲是並照會佛夷令其一同援照米國之
例少帶從人由北塘進京換約即或俄夷同來毋庸阻止恒福不
必向其答話前俄寄鴛包一件著即送去並告知見無應商之事
催令即行起碇勿在海口逗留該大臣等諒必斟酌妥善也○己

丑諭內閣前諭四川省辦理團練並令在京官員各舉所知候旨
派往茲據給事中趙樹吉酌保各員請旨簡派在籍前任詹事府
右春坊右贊善李惺著賞加五品卿銜作爲四川督辦團練大臣
並著前任宜昌鎮總兵虎嵩林成都府知府楊重雅幫辦團練事
宜卽按照河南等省所擬團練章程並嘉慶年間該省舉行堅壁
清野之法體察情形妥爲辦理○諭軍機大臣等僧格林沁等奏
夷人分股攻撲新河馬隊不能支持一摺據稱二十六日夷人出
隊馬步約有萬餘分撲新河軍糧城我軍因眾寡不敵見已退守
唐兒沽等語唐兒沽距大沽僅止八里爲大營後路最關緊要著
卽嚴飭克興阿等扼守壕牆不准稍有鬆懈西凌阿防堵北塘一
帶是其專責此次雖因眾寡不敵馬隊不能鈔擊究係該都統未
能奮勇抵禦所致西凌阿派撥吉林馬隊必須設法迎頭截剿儻

再有貽誤該都統豈能當此重咎。僧格林沁見調山海關馬隊前往天津駐紮著卽飛催前進。該大臣惟當鎮定軍心。妥爲調度。不可稍涉張皇。恒福辦理撫局。責無旁貸。不得因業經接仗。遂置撫局於不問。著仍遵前旨設法轉圜。以顧大局。○官文胡林翼奏欽奉諭旨詢問左宗棠能否督辦四川軍務。臣等往返函商。曾國藩渡江僅帶朱品隆所部三千人。並湖北所撥鮑超等勇七千人。如欲分謀池太兼顧江西揚州。必須厚集兵力。探聞江蘇之賊近已回屯蕪湖和州兩岸。是欲窺伺湖北江西爲西犯之謀。曾國藩一軍亦嫌力單。左宗棠以新練之軍於襄辦江皖軍營尙堪有濟。若督辦四川軍務恐難勝任。查粵西撫臣劉長佑自隨前任安徽撫臣江忠源轉戰粵西湖北安徽江西等省。久於行陣。其舊部李明惠劉坤一江忠義席寶田等皆堪分任軍旅。可一面先行馳援重

慶等處一面在湖南增募二三萬人入川剿辦必能得力若令劉長佑由間道出酉陽秀山兼程進保重慶取徑最捷保全甚大如慮石逆先期竄蜀或改道荆宜速保夔州尚可補救 上諭前因四川軍務緊要擬令左宗棠前往督辦當諭官文胡林翼將該員能否勝任迅速具奏茲據奏稱左宗棠督辦川省軍務難收速效若令劉長佑由酉秀進保重慶取徑甚捷保全甚大等語左宗棠既不能獨當一面卽毋庸赴川仍襄辦督辦軍務廣西省見在防剿正當喫緊劉長佑未便遠離該省湖南地方尙稱安靜著略秉章卽馳赴四川督辦軍務該撫於湖南紳士素爲熟悉擇其曉暢軍務者酌量帶往並添募湖南練勇以資剿辦湖北軍營中曾經戰陣得力之員籍隸湖南者亦不乏人著官文胡林翼酌派數員交駱秉章差委石達開窺伺川疆滇匪尙未撲滅其勢岌岌可

虞東純見署川督未諳軍旅該撫務卽迅速啟程由便道入川毋稍延誤蕭啟江所帶之勇據官文等奏已咨令都司彭忠信候選同知直隸州知州王沐分起管帶此項勇丁及川省兵勇均歸該撫調遣以冀迅掃賊氛駱秉章出省後湖南巡撫著文格暫行署理將此由六百里各諭令知之○諭許乃普奏皖浙交界情形並請飭辦理皖南團練一摺皖南爲江浙門戶地當要衝曾國藩已抵建德卽日進紮徽境見在各省舉行團練皖南地方緊要自應一律辦理前據鴻臚寺卿程祖誥奏翰林院侍讀呂錦文在籍有年籌辦團防擊退竄匪著有成效請飭令辦理皖南團練事宜茲據許乃普奏請飭工部郎中余述祖回籍辦理婺源團練該員資望較淺若令專辦該縣團練當可得力呂錦文在籍率團擊賊辦有成效未知能否勝督辦之任著曾國藩察看情形擇其諳練軍

務素繫人望者酌保一員迅速奏聞候旨簡派卽令督辦皖南團練事宜以期協助官兵保衛疆圉許乃普原摺著鈔給閱看將此由六百里諭令知之○諭前據薛煥奏籌濟鎮江及大江水師餉糈並滬上道府無員可委札飭喬松年在江北遴委委員辦理江南糧臺茲據查文經奏餉需無款可指專候接辦糧臺委員前來督辦等語當常州失陷之後兵勇潰散存營兵勇無多該員所稱普放水陸各營一月口糧並途次補放借給之款共放銀十八萬三千二百餘兩難保無任意冒銷之弊查文經著卽革職由薛煥嚴密訪查有無藉端虛冒情事並飭令將從前經手收支各款交代清楚如有含混侵蝕情弊卽著嚴行參辦至江南糧臺存項無多無款可指見在大江水師及長龍船待餉孔殷必得迅派委員辦理辭煥不必拘定官階大小趕緊遴選公正諳練之員仍遵前

旨設法籌款飭令帶往江北辦理江南分設糧臺專放鎮江一軍
及大江水師軍餉不得以無員可委盡誘之喬松年派員經理儻
有貽誤致令諸軍飢潰惟辭煥是問將此由六百里諭令知之○
命安徽按察使毛鴻賓總辦皖北營務○辛卯 硃諭僧格林沁
握手言別倏忽半載見在大沽兩岸正在危急諒汝在軍中憂心
如焚倍切朕懷惟天下根本不在大沽海口實在京師若稍有挫
失總須帶兵退守津郡設法迎頭自北而南截剿萬不可寄身命
於礮臺切要切要離營後南北兩岸礮臺須擇可靠之大員代爲
防守方爲妥善朕爲汝思之身爲統帥固難言擅自離營今有硃
筆特旨並非自己畏蒞有何顧忌若執意不念天下大局止了一
身之計殊屬有負朕心握管不勝悽愴諄諄特諭汝其懍遵此硃
諭著載垣端華軍機大臣公同閱看附廷寄六百里加緊發去○

翁同書奏沙河以北捻圩林立捻首程保民築圩盤踞尤爲諸捻渠魁臣派副將黃鳴鐸等疊次圍攻六月十二日該逆乘夜外竄

虞圖撲我礮船經水軍連環轟擊斃賊多名仍卽退入圩內十三日突來援賊千餘人黃鳴鐸親發十餘矢連中賊首繼以槍礮斃賊無數該匪四散分路繞撲水軍程圩捻眾亦由北面突出攻撲經苗沛霖派隊從中截殺將竄賊刺斃多名餘匪悉遁回巢十四日該逆全數出竄我軍水陸分路堵擊殲斃殆盡敗賊出圩投誠將捻首程保民尤寅眷口縛獻據稱該二逆已遁赴孫葵心捻圩並將該二逆心腹李金菽孫麻孜捆送軍前苗沛霖等因該逆抗拒日久腎不畏死若概從寬宥將貽後患當率兵練乘勝擁入小河將兇悍捻逆盡數屠戮其餘老弱難民卽行薙髮釋放於十七日將程圩攻拔沙河兩岸一律肅清黃鳴鐸等督率各營不避艱

險將積年巨愆一旦殲除均屬異常出力合無仰懇 天恩優予

獎敘其餘出力之將弁兵練等容再查明彙案請獎以勵戎行

上諭內閣程圩擒首程保民爲諸擒渠魁經翁同書飭令川北道

苗沛霖等疊次圍攻殲斃殆盡卽將程圩攻拔沙河兩岸一律肅

清剿辦甚屬得手此次尤爲出力之四川川北道苗沛霖著賞加

布政使銜陝西潼關協副將黃鳴鐸著賞加總兵銜廬鳳道才宇

和著賞加按察使銜其餘出力之將弁兵練等著翁同書查明保

奏○諭軍機大臣等本日據僧格林沁等奏唐兒沽被夷占踞大

沽兩岸危在旦夕一摺據稱該夷大隊於二十八卯刻先欲渡河

因我兵防守嚴密隨向唐兒沽攻撲我軍相持兩時傷亡甚眾餘

俱退回見在拉撒浮橋台潰兵均歸北岸礮臺以圖扼守各等語

該大臣見以兵勇悉力抵禦如果無可支撐惟當設法酌撤由該

大臣等督帶馳赴天津扼要守禦以固京師門戶至該大臣韜略素嫻久爲朕躬所倚賴見在身膺重寄惟當以大局爲重不可因目前小挫致有憤懣之心總當妥爲調度鎮定自持以期挽回補救是爲至要該大臣所寄載垣等信函業由軍機大臣呈覽矣○諭連日疊據僧格林沁等奏英佛等夷占踞北塘村莊其大股分撲新河軍糧城我軍接仗失利本日據奏唐兒沽亦被占踞大沽礮臺危急亟宜厚集兵力以嚴捍禦而固畿疆著托明阿於原調馬隊一千外再行挑撥馬隊五百名共一千五百名成凱德勒克多爾濟英桂於太原綏遠歸化各城內挑選駐防兵一千名春佑挑選熱河兵五百名譚廷襄挑選陝西兵三千名慶昫於原調馬隊一千外再行挑選馬隊一千名共二千名文謙挑選直隸兵三千名並文煜將本年原調之山東兵三千名恩夔將本年原調之

青州兵五百名玻崇武酌量於密雲調派若干名均須趕緊調派一律精壯配齊軍裝器械火藥鉛丸各派大員管帶卽日啟程馳抵通州聽候瑞麟調遣該將軍等務須毋涉張皇致令民情驚擾並不可稍涉延緩貽誤事機將此由六百里諭令托明阿等並傳諭文謙知之○諭本日派大學士瑞麟統帶京旗各官兵五千名於七月初一日啟程前往通州並尙書伊勒東阿所帶官兵四千名共馬步隊官兵九千名所有應領餉項已諭令戶部先撥銀十萬兩交順天府支應卽著張祥河董醇於通州安設糧臺照例支放並派委廉幹大員前往督辦毋稍遲誤將此諭令知之○命大學士瑞麟理藩院尙書伊勒東阿統帶官兵赴通州防堵○撥戶部銀十萬兩命張祥河等往通州設糧臺○曾國藩奏候補四品京堂左宗棠前在湖南贊助軍事肅清本境克復鄰省上年石逆

賈湘幫同撫

臣

駱秉章指揮調度其才可以獨當一面前奉諭旨

令襄辦軍務該員聞詔之日卽在湘募練五千餘人俟秋間成軍

率以東下若令該員獨往川省則

臣

頓少一枝勁旅恐不足當皖

南之逆氛合無籲懇

聖恩俯念

臣

襄助需人仍令左宗棠督勇

來皖實於江楚等省大有裨益奏入

上從之○曾國藩奏查大

江北岸安慶無爲和州各城南岸池州蕪湖太平各城皆濱臨大

江將來陸軍進攻金陵沿江埽蕩必藉水師夾剿之力吳全美李

德麟等師船本駐魯港見因下游喫緊遵旨將吳全美調往並經

臣

飭李德麟全軍併赴狼山福山焦山瓜州一帶以資分布所有

蕪湖以上江面

臣

卽商令楊載福彭玉麟派營接防目下蕪湖縣

城未復東西梁山未破吳李二鎮下駛後與上游相隔過遠未易

聯爲一氣

臣

見往祁門距安慶江面已三百餘里此後或進駐徽

甯或馳赴淮揚軍情瞬息變更機宜固不可遙度奏報尤不可太遲若概由臣處轉奏誠恐稽延貽誤楊載福統帶水師身經數百

戰謀勇器識度越諸將其江面戰守事宜似應仍令該提督會同

彭玉麟妥辦並由該提督自行具奏以期稟承 聖訓無誤事機

得旨允行○曾國藩奏欽奉諭旨以張芾等任賊長驅致使大局

決裂令臣察度臣沿途訪問皆謂張芾所部兵勇近來甚不得力

周天受駐守甯郡餉項久虧軍心渙散臣竊計該二郡兵勇如果

足資攻剿應不至如此決裂臣於六月十一日進駐祁門距徽甯

均數百里初到此間情形未悉且兵將未齊勢難前進張芾所部

各軍應暫由該副都御史統籌調度俟左宗棠張運蘭等新軍到

皖後再行悉心察看酌度辦理報聞○壬辰諭內閣著派文俊恒

祺前往北塘海口伴送英佛二國使臣進京換約○諭軍機大臣

等本日據僧格林沁等奏二十八日卯刻夷人仍踞唐兒沽並未
出村尋釁該大臣等將應設礮位等妥爲布置人心較定並由恆
福給與英佛照會告以大皇帝業已派有大臣在京等候該使臣
等商議尙未接有照覆等語見已將文俊恆祺前往北塘伴送該
使臣進京換約之處明降諭旨該大臣等見在無論行抵何處著
卽兼程前進儻該夷索看旨意可卽將本日明發諭旨給與閱看
接見以後是何情形著卽詳悉馳奏將此諭令知之○諭前經明
降諭旨派桑春榮爲督辦順天直隸團練大臣見在京畿東南一
帶亟應興辦從前粵匪竄擾天津近京地方如武清等州縣均各
辦有成效備見民情好義足以助兵力之不逮所有各處團練成
規具在自不難迅速舉行著張祥河董醇會同桑春榮卽飭近畿
東南兩路各廳州縣趕緊先行辦理應如何團結訓練以杜奸細

之窺伺以作同仇之志氣務須悉心斟酌俾臻妥善其從前武清等處辦理章程有可採擇之處著與見議各章程參酌互用並須於數日之內一律舉行不得稍涉延緩至京畿西北兩路及直隸閩省俟東南各州縣辦有頭緒後再行次第籌辦將此各諭令知之○是月緩徵山西臨汾洪洞二縣被旱被雹新舊額賦